



Quotidiana Christiani Militis Tessera

Stanyhurst, Guillaume

Coloniæ Agrippinæ, 1682

6. Dies Januarii. Qui se sibi Magistrum constituit, stulto se discipulum subdit. Bern. Epist. 87. ad Ogeri.

Nutzungsbedingungen

[urn:nbn:de:hbz:466:1-55659](https://nbn-resolving.org/urn:nbn:de:hbz:466:1-55659)

Januar.

Tessera.

13

in mundum, non ut esses de mundo, sed supra mundum, ut sic aliquando sis intra cœlum. Illum despice, hoc suscipe, ut te olim suscipiat. Et illud altè menti imprime, frustra sum, frustra hîc vivo, frustra omnia, dum hîc dego, ago, totoque cœlo aberro à cœlo, si quid studiosius quero, & impensius opto pro eo, quod est optabilium omnium optabilissimum, Cœlum. Procul à nobis illud pessimum pessimorum axioma: *Quæ supra nos, nihil ad nos.* Imo nihil magis est nostrum, quàm quod est supra nos. Tamen si angusto calle tenditur ad illa, quæ sunt sursum, pii Vatis calculo, dum ita canit:

Est iter angustum, quod ducit ad æthera sursum.

6. DIES JANUARI.

Qui se sibi Magistrum constituit, stulto se discipulum subdit. *Bern. Epist. 87. ad Ogeri.*

Opus est I.
Directore
in via perfectionis.

Quid refert scire, ut ordinem serves, ea esse eligenda primum, quæ dignitate sunt prima, si quæ illa sint, ignores? Ideò eligendus est Magister, sub cujus disciplinâ sis in viâ vitæ, non tantùm ab errore tutus, sed à metu erroris securus. Si nolis esse discipulus hominis, fies tibi ipsi magister erroris. (a) *Nulla ars sine tempore discitur, & absque praeceptore. Ars artium sola sine*

Magistro

(a) *S. Nilus, lib. Asce.*

Magistro percipitur? Nunquã te è servitute vitiorum manu mittes, nisi habeas qui te ad libertatẽ manu ducat. Trini illi ex Oriente Reges, cũ ad illũ tenderent, qui est Via, habuerunt viæ ducem è cœlo stellam. (a) *Stella antecedebat eos.* Auspiciis stellæ, ducti sunt ad Solem. Tres tibi sunt animi vires, veluti totidem Reges: non regent illæ, nisi regantur. Nec unquam eris tui rector, nisi sit tibi cautus director. Si tibi velis esse magister, cùm sis ignorans, quid disces, nisi ignorantiam? Quomodo enim sub tui magisterio aliquid scies, cùm ne id quidem scias, te nihil scire? Quæ tamen scientiæ pars est, non tantũ magna, sed prima.

II. Bina te ad hujus disciplinæ capeffendæ necessitatem doceant, & moveant exempla. Alterum D. Augustini; cujus hæc sunt verba: (b) *Si posses me docere, quod ignoro, libentissimè te sufferrem non solũ in verbis increpantem, sed & verberibus castigantem.* Alterum D. Anselmi, qui dicebat: (c) *Mallẽ inter pueros sub virga Magistri pavere, quàm toti Britannia in conventu populorum, Pontificali cathedra præsidere.* Tutiũs est, ut discas descendere ad subsellia, quàm ut doceas ascendere ad pulpita. Circa te tetra est caligo, infra te frequens vorago. Pro illa ut videas, opus est luce; pro hac ne cadas, opus est duce. Utrobique opus est direttore. Nec enim caret crimine, exponere se tanto discrimini. Pericula sunt, non tantũ circa nos, sed intra nos. Sed majus omnium periculum est, securitas nostra: nam est omnia pericula. Quomodo potes esse securus, cùm ipse tibi sis

inimi-

(a) *Matt. 2. 9.* (b) *Aug. Epist. 75.* (c) *In vita eius*
l. 2.

Januar.

Tessera.

15

inimicus? Itaque nusquam non, & nunquam non periclitaris. Intra te, tu ipse tibi es hostis, extra te, totus mundus, infra te totus orcus. Tot inter, & contra hostes, tecum pugnans, & repugnans, audes sine gnaro duce sperare victoriam?

III. Is porrò, quem tibi seliges in hac disciplina Magistrum, sit talis, qui tibi plus profit exemplo, quàm præsit imperio; qui tibi consulat, dum illum consules: qui (ut vocat D. Benedictum D. Gregorius) reddat te (a) *scienter nescientem, & sapienter doctum*: qui doceat te pauca loqui, sed multa facere; cujus conversatio, vim præcepti obtineat; cujus vita, sit vivendi norma; cujus aspectus, sit morum censura; qui sic agat, sic dicat, ut ne à Momo quidem possit reprehendi. Hujusmodi ducis auspiciis, in hac lubrica arena prælia Domini præliaberis, non tantum fortiter, ne vincaris, sed feliciter, ut vincas. At necesse est, ut illius in omnibus audias monita, sequaris consilia, exequaris imperia: & poteris sic impavidus ire inter pericula & contra pericula. Hujus prudentia, tibi erit, quæ te antecedit, stella, cujus lumine duceris in hac vita ad Bethleem, domum panis; post hanc vitam in Jerusalem, visionem pacis. E caelo affulgebit tibi stella, Dei gratia; in terris prælucebit tibi lucerna, hominis industria. Hæc geminâ luce, evades filius lucis. Nec in tenebris cæcuties, prælucente pedibus, & oculis hac lucerna. Cum teste Poëta:

Ut melius cernam, porto de nocte lucernam.

(a) Gregor. I. 2. Dial. in Pref.

7. DIES